

## **KONTROL MOZIOA**

### **ALTZAKO HERRI LANAK DIRELA ETA**

Zigor Etxeburua Urbizuk, EH Bildu udal taldeko zinegotziak, Udaltzaren Organo Araudiko 98. artikulua oinarri, mozio hau aurkezten du, Udaltzaren azter dadin. Mozioa 2019ko urriaren 14an Gune Publikoetako Batzordean aztertutako interpelazioaren ondorioa da.

## **JUSTIFIKAZIOA**

Kezkagarria iruditzen zaio EHBildu udal taldeari Donostiako udalak erakusten duen kontrol eza Altzan egiten dituen herri lanen inguruan; gabezia hori ez da berria, Eneko Goiaren eta bere koalizio gobernuaurreko agintalditik baitator. Ondo gogoan ditugu, adibidez: Harria parkeko estalpeak izandako atzerapena eta gorabeherak, Oleta ikastetxean amiantoz kutsatutako parterreen tratamendu eskasa, edota kiroldegi berria eraikitzeko lanak atzeratzea.

Abian den agintaldian ere, aipatu herri lanen kontrol ezak jarraitu egiten du. Larres izeneko eremuan 176.052 m<sup>3</sup> lur bota dira Toschi-Iberica enpresak urtetan isuritako amiantoa isolatzeko. Auzotarrek eta Altza Osasuntsuagoaren Aldeko Plataformak eskatuta, esku-hartze horri aprobetxamendua eman zaio eta auzotarrentzako mesederako eremu bilakatu da. Parkea uda honetan ireki zaie herritarrei. Bada, batetik, parke berrian luiziak izan dira, eta bestetik, herritarren aldetik hainbat kexa jaso dira zoladuraz prestatu den pasealekuko zenbait eremu ibilgaitzak eta oso arriskutsuak direlako, duten malda itzela dela eta.

Horiek gutxi ez eta azken hilabeteotan Altzako hainbat familiak pairatu behar izan dute Harri Berri Ikastetxeko patioan estalpea egiteko lanen atzerapena. Hasieratik gorabehera handiak izan dituen egitasmoa da hau. 2019ko ekainaren 4an esleitu zuen Udal Gobernuak Harri Berri Ikastetxeko patioan estalpea egiteko lanen kontratua. Estaltze lanak esleitzeko erabakiak zehaztu zuen betetzepea 3 hilabetekoa izango zela. Udal teknikariek ikastetxeko arduradunekin adostutakoaren arabera, lanak udako oporraldiarekin batera egitekoak ziren. Enpresak, ordea, lanekin hasteko legez eska dezakeen hilabeteko atzerapena eskatu zuen. Lanak behar baino beranduago hasteak egindako antolaketa aurreikuspenak hankaz gora bota zituen. Gainera, enpresak ez ditu bere konpromisoak behar bezala bete, eta atzerapena handitu egin da. Horren ondorioz, hilabeteko beste atzerapen bat onartu behar izan du Udal Gobernuak, atzerapen horregatik zigorra ezartzeaz batera enpresari. Bitartean, Harri Berri ikastetxeko HHko 132 ikasleek, beren gurasoek eta ikastetxeko irakasle eta gainerako langileek beraien egunerokoa aztoratuta eta zailduta ikusi dute, aski informaziorik jaso gabe udalaren partetik, eta irtenbideak eurek beraiek topatu behar izan dituztelarik.

Hain zuzen ere, herri lanen garapenaren kontrol ezari gehitu behar zaio erreaktiboki jarduteko udalak duen ohitura, eta irtenbideak emateko erakusten ari den ezintasuna edo, onenean, moteltasun handia. Gure taldearen ustez, Udal Gobernuaren ohitura bihurtzen ari da proiektuak

**EH Bildu talde politikoa**

Grupo político EH Bildu

Ijentea, 1 - 20003 Donostia  
Tel. 943481027 eh\_bildu@donostia.eus-- [www.donostia.ehbildu.eus](http://www.donostia.ehbildu.eus) -

komunikatiboki saltzea, baina gero agindutakoa ez betetzea, auzotarrei inolako azalpenik eman gabe.

Horregatik, pasa den urriaren 14ko Gune Publikoetako batzordean interpelatu genuen arloko zinegotzia eta galdetu genion zergatik ez diren Altzan egiten ari diren herri lanak Altza bertatik zaintzen, Ekialdeko Barrutiko bulegotik, hain zuzen ere. Zinegotziak, ordea, ez zuen erantzun.

Horiek horrela, honako hau da behean sinatzen duen zinegotziak aurkeztutako **KONTROL MOZIOA**

1.- Donostiako Udalbatzak hertsiki eskatzen dio Udal Gobernuari Altzan egiten ari diren herri lanak Altza bertatik zaintzea, Ekialdeko Barrutiko bulegotik, hain zuzen ere, herritarren informazio eskubidea bermatzeko, herritarren parte-hartzea ahalbidetzeko, eta administrazio publikoek zaindu behar dituzten efikazia eta efizientzia printzipioak betetzeko.

Donostian, 2019ko urriaren 18an.

Zigor Etxeburua Urbizu  
EH Bildu udal taldeko zinegotzia